

TUSAGATSAk TAPVAINAk

Septembara 29, 2016

Tapvainak SakKititaugialik

Sivuppiatitsisimanik Muskrat Falls katimautigijautillugu ilautillugu Prâvinsik, tâvatuak suli killigiudjituKalaungilak ilonnâgut pejaipviugianganut

Nunatsiavut kavamanga tungaviKajuk ilonnâgut piggagasuattuKajutsauninganik ilonnanga pejaipviugiaKanninganut Muskrat Falls tasialutsanga ulittitauKâtinnagu, killigiudjiutiKaKattasimagaluattillugu Newfoundland Labradorilu kavamanga kamagiamut, pigunnausigijaujutut, isumâlotigijaujunik Kulannangitumik pitsatusivallialânnanganut timimmut piujongituk tajjaujuk methylmercury kogutjaulâtunit atânidlianejunut suliagijaupvinganit.

Nunatsiavut AngajukKânga Johannes Lampe amma Nunait amma Nunammiutanut Pivianattojunut Minister Darryl Shiwak katimaKatiKasimalauttok AngajukKâsuak Dwight Ball-imik, Avatinut amma Silaup Asianguvalligutinginnut Minister Perry Trimper-imik amma Nunammiutanut Pivianattojunut Minister Siobhan Coady Montâgiutillugu, suligiallak, sakKititsigiamut isumâlotigijaujunik Kulannangitumik sakKititsigajattumik ulugianattojumik inosimmut amma Kanuinginigijausomik amma inogusigijanganik Labradorimiut pititsitillugu tainna Muskrat Falls-imi suliangujuk.

“Tainna AngajukKâsuak Kaujititsilauttuk Newfoundland, Labradorilu kavamanga pikKujigajangituk Nalcor-imik ilonnâgut salummasaigiamut tasialutsamik sivungani pigianningata ulittitauningata, âkKitausimalittuk ulittitaugianga tapvani ukiangulâtumi,” uKajuk AngajukKâk Lampe.

Pigiannimi ulittitauninga attuiniKalâttuk 25 per- sintitut angitigijumik tasialutsami, KummuanikKalluni imangata puttunigijanga mânnaujumi puttuniKajumit 18 metatut tikilluni 25 metamut. Ammiakkutaulâttuk anginilik 75 per- sintitut tasialutsami nigiugijaujuk ulittitaugiangaut Kangamikkiak 2019-nami.

“Kunomminalauttuk Kaujigiamut ilonnâgut pejaipviulângininganik sivungani pigiannimi ulittitaunningata, tâvatuak tainna AngajukKâsuak killigiudjiutuliulauttuk tapvainammagik pigiasititsigiamut piusitsamik Kaujisagiamut suvalliniKagajammangât ilonnâgut pejaipviummasattaugajappat tainna amiakkutaumajuk 75 per- sintitut anginiKajuk tasialutsami sivungani ilonnanga tatattauKâtinnagu,” uKasimajuk AngajukKâk Lampe. “Kaujitalauttavut AngajukKâsuak tungavigijavut asiangusimangininganik, amma ilonnasiamaginga tasialutsak ilonnasiamaginga pejaipviusimagiaKanninga napâttunik, pigutsiagalannik amma Kânganejunik nunajannik Kanullonet ulittitaujuKakKâtinnagu.”

Tainna AngajukKâsuak ammagiallak killigiudjiniKalaummijuk uKâlautiKagiallagiamut aippanginnik pingasunik Nunatsiavut kavamangata pikKujaliusimajanginnik nalunaittitausimajunik Muskrat Sulijumik SittutitaukKujauninganut ottuganniusimajumi, ukunungauluak:

- Sukkutitauttailinitsamut Aulatsiusitsamik AngiKatigeKatiKagiamut Nunatsiavut kavamanganik;
- sakKitisigiamut Immigojunik IlisimanniKallagittunik UKaudjigiajiullutik katimattisanik ilitagijaugutiKajumi ilinniasimajunik ilisimajullaginik uKaudjigiajitsanik pannaitaugutitsanganut amma Kimiggutaugutinganik kamatsialaginnikut, tunganattojumik, amma ilonnâgut piunippaugajattunik kamagijaugutitsanginnut suliangujumut kamagijaugianginnut kogudjauKattatut sukkuinigisonginnik Muskrat Falls-siup avatimik amma inosinik, atuttautillugit piunippaujut atuinnaujut Kaujisattilaget amma Inuit Kaujimmannigijangit; amma
- tunitsigiamut Inuit ikajuttigeKatigennikut kajusititsisongugianginnut pitsatuniKattitaugutitsanginnik ilingajunut kogudjauKattatut avatet kamagijaugutinginnut, aulataugutinginnulu.

“Taimâtsainak pikKujitsainaniakKugut ilonnâgut pejaipviuKujilluta, ikKanattuttumagiuvuk tapvainammagik sakKititsigiamut atuvalliniKallagittumik kamagijaugutinginnut suliangujutsamik ottuKattagiamut Kanuk angitigijuk timimmut piujongituk taijaujuk itiKattamangât avatinginnejunut kingungani pigiannimi ulititsiniulâttop piunitsamik tukisisonguKattagasuamut nigunattojunik sukkuinigilâttinginnut,” uKajuk Minister Shiwak. “Tamanna kamagijaugutitsamut suliangujuk ikKanattumagiujuk kamatsianiKagiattunut atuinnaugiamut sittutitsiKattagiamut nallituinnanginnik sukkutauniKagajattunik sakKiKâtinnagit.”

Aprèl 18, 2016-nami, Nunatsiavut kavamanga sakKititautitsisimajut immigojumik Lake Melville Kaujisattilaget Kaujitsiutinganik, sakKititautisimajunik sitamani jârini unuttut-kamagijautillugit Kaujisannigijausimajumut sakKititautitsisimajumik ikKanattumagiujunik Kaujisattilaginut napvâtausimajunik pidjutiKajunik Kanuk timimmut piujongituk taijaujuk methylmercury katitsuKattamangât Lake Melville-iup avatinganejunut amma Kanuk sukkuiniKalâmmangât Inunnik tatiKaKattatunik taikkunani avatinganejunik niKitsasiugiamut ammalu pivianattutanginnik.

Malittautillugu Harvard Ilinniavitsuangata Kaujitsiutigisimajanga, hontagiallât Labradorimiut Inuit Kaggutitaulâtut maligatsatigut pitsakinnigialinginnut malittaugialinnik timimmut piujongitumik taijaujumik methylmercury tainna Muskrat Fallsiup tasialutsanga ilonnâgut pejaipviungipat Kijunnik, uppiganik, pigutsiagalannik amma Kânganejunik idjunik.

Tamatsumunga Kaujisanniusimajuk takutsautitsijuk ulittitauppat Kummuakallalânninganik pitsatunigijanga timimmut piujongitop taijaujop methylmercury sakKititauluni Muskrat Fallsiup tasialutsangata iluani 120 sitonet Kummuasimagajattumik unuttugalanni jârini. Timimmut piujongitumut taijaujumut methylmercury attutauniKaKattatut Inuit iniKajut Kanitanganejuni Lake Melvilleiup mânnaujumi puttunippaujut Canadami ununnigijaujuni, ammalu sutaijattumik puttusigiallâtut kingungani ulittitausimanningata kisianiungituk tasialutsanga ilonnâgut pejaipviusimappat. Rigolettimiut puttuluammijumut ulugianattumettitaujut pitsatunitsamut timimmut piujongituk taijaujuk methylmercury-mut attutauniKagiamut saniani Inuit iniKajut Upper Lake Melvilleiup Kanitangani pititsitillugu anginitsamik tatiKaKattaningit nunagijaujumi-katitsutauKattatunik niKitsagidlugit.

Tusagatsaligijik Kaujisapviugunnatuk:

Bert Pomeroy

Director of Communications

709-896-8582

709-899-0004 (cell)

bert.pomeroy@nunatsiavut.com